

名賢氏族言行類稿

詳校官典籍臣潘奕雋

主事臣祁韻士覆勘

欽定四庫全書

名賢氏族言行類稿卷二十

宋 章定 撰

高

三百九十四

姓纂齊太公六代孫文公子高孫侯以王父字為氏
左傳桓公五年諸侯伐鄭鄭禦之高渠彌以中軍奉公
為魚麗之陳

閔公二年冬齊高子來盟

成公十五年經叔孫僑如會高无咎於鍾離 傳會吳於鍾離始通吳也

昭公十二年齊高偃帥師納北燕伯于陽

哀公十一年齊高无丕帥師伐我及清

毛詩絲衣高子曰靈星之尸也

說苑齊高廷問於孔子曰廷精氣以問事君之道願夫子告之

史記高柴字子高衛人長不盈五尺受業孔子孔子以

為愚子路使為費邸宰

前漢儒林高相沛人治易亡章句專說陰陽災異

後漢高彪字義方除郎中校書東觀數奏賦頌奇文因
事諷諫靈帝異之遷內黃令帝敕同僚臨送祖於上
東門詔東觀畫彪像以勸學者

逸民高鳳字文通專精誦讀妻嘗曝麥於庭令鳳護雞
天暴雨鳳持竿誦經不覺潦水流麥遂為名儒教授
於西唐山中

儒林高詡字季回以父任為郎中世傳魯詩以信行清操知名光武除為符離長後拜大司農以方正稱

方術高獲字敬公

魏志高柔字文惠為刺史姦令史處法平允又夙夜匪懈至擁膝抱文書而寢魏初為尚書郎轉丞相理曹掾清識平當明于憲典後為太尉

晉書高光字宣茂朝廷咸推其明於用法頻典理官

高崧字茂琰少好學善史書舉秀才除太常博士累遷

侍中呼其小字曰阿鄴故有才具邪

載記高瞻字子前少而英爽有俊才後降于慕容廆署
為將軍稱疾不起

南史高爽博學多才坐事被繫作鑊魚賦以自況其文

甚工

附卞
彬傳

北史高允字伯恭少孤夙成有奇度崔宏見之歎曰高

子黃中內潤文明外照必為一代偉器 博通經史

天文術數尤好春秋公羊 曾作塞上詩有混欣戚

遺得喪之致 後領著作述成國記文成曰高允真

忠臣矣朕有是非恒正言面論朕聞其過天下不知

其諫拜中書令 為郎二十七年不徙官 游雅曰

余與高允子游處四十餘年未見是非喜悅之色予

嘗呼為支子崔公謂余云高生豐才博學一代佳士

文成嘗呼為令公崔浩考漢元以來日月五星允曰

善言遠者必先驗於近且漢元年冬十月五星聚于

東井此乃歷術之淺事今譏漢史而不覺此謬恐後

之譏今猶今之譏古浩曰云何允曰金水二星常附
日而行冬十月日旦在尾箕昏沒於申南而東井方
出於寅此二星何目背日而行少傅游雅曰高君長
於厯當不虛言也浩後考究果如允語 後告老遷
尚書散騎常侍時延入備几杖詢以政事出入三省
五十餘年 子忱字士和位長安太守為政寬惠百姓
安之 綽字僧裕遷洛陽令為政強直不避豪右京
邑憚之 允弟推字仲讓魏以前後南使不稱妙簡

行人詔推使宋南人稱其才辯

高祐字子集博涉書史不拘小節孝文初拜秘書令後
為兗州刺史請縣黨立黷序風化大行盜賊止息

高德正幼而敏慧有風神儀表累遷相府掾神武委以
腹心徙黃門侍郎方雅周慎動見稱述仕齊遷右僕
射網紀朝政多有宏益

高乾字乾邕明敏俊偉有智畧輕財重義多所交結後
為黃門侍郎兼侍中

高昂字敖曹幼時便有壯氣龍犀豹頭姿體雄異每言
男兒當橫行天下自取富貴誰能端坐讀書作老博
士也其父曰此兒不減吾族當大吾門以其昂藏敖
曹故以名字之

高閭字閭士博綜經史下筆成章仕魏為中書侍郎獻
文立上至德頌文章富逸為獻文所知參論政事為
給事中委以機密詔令書檄皆其文也後表遜位
宣武引見東堂賜以肴羞訪之大政以其先朝儒舊

告老求歸帝為之流涕賜安車几杖強果敢直諫於
朝廷廣衆之中談論鋒起人莫能敵孝文以其文雅
之美每優禮之 嘗為相幽二州刺史廉儉自謹有
良牧之譽 子元昌位遼西博陵二郡太守 弟悅
篤志好學有美於閭

高道悅字文欣仕魏後為諫議大夫正色當官不憚強
禦居法樹平肅之規處諫著必犯之節 轉太子中
庶子正色立朝儼然難犯宮官上下咸畏憚之

高聰字僧智涉獵經史頗有文才拜中書博士

高恭之字道穆父崇字積善景明中除洛陽令為政清
斷吏人畏其威風發摘不避強禦道穆所交皆名
流雋士每曰人生當夕脫羊裘朝珮珠玉

高謙之字道讓事後母以孝聞好文章留心老易為河
陰令損益政體多為故事父子兄弟並著當官之
稱

高隆之字延興仕齊錄尚書事領大宗正卿監國史欽

尚文雅搢紳名流必存禮接訓督諸子必先文義

高琳字季珉後加驃騎將軍周孝閔時討平文州氐師
還帝宴卿士賦詩言志琳詩末章云寄言寶車騎為
謝霍將軍何以報天子沙漠靜妖氛

高構字孝基仕隋為吏部侍郎號為稱職前後典選之
官皆出其下

高頴字昭玄隋文帝以其習兵事多計略引為府司錄
有左僕射龐晃短頴於帝帝怒黜之因謂頴曰獨孤

公猶鏡也每被磨瑩皎然益明 類有文武大畧明
達政務竭誠盡節進引忠良當朝立政將二十年野
朝推服時致昇平論者以為真宰相

唐高儉字士廉以字顯齊清河王岳之孫敏惠有度量
狀貌若畫觀書一見輒誦敏於占對 薛道衡崔祖
濬皆宿臣顯重與為忘年友由是有名 武德中秦
王領雍州牧薦士廉為治中親重之蜀人畏鬼而惡
疾雖父母病皆委去士廉為設教條辨告風俗大變

又引諸生講授學校復興秦時李冰導汶江水灌田
瀕水者須千金士廉附故渠廝引旁出人以富饒入
為吏部進封許國公雅負裁鑒又詳氏譜遷尚書僕
射士廉三世居此官世榮其貴太宗幸洛陽太子監
國命攝少師太子令曰寡人資公訓導比聽政據案
對公竊所未安宜設別案貞觀年卒帝親臨喪自為
文喪出登城望哭高宗即位贈太尉配饗太宗進
止詳華凡有獻納搢紳皆屬以目奏議未嘗不焚稿